

清 史 列 傳

冊 主



# 清史列傳 卷七十二

## 文苑傳二

趙青藜 汪越

趙青藜字然乙安徽涇縣人生穎異九歲能文乾隆元年進士改翰林院庶吉士散館授編修三年充浙江鄉試副考官五年遷江西道監察御史六年充浙江鄉試副考官旋丁母憂歸服闋補山東道監察御史十年充湖南鄉試正考官青藜居御史臺前後五年有直聲能持大體不爲激切之語章疏凡數十上如請清屯田歸運丁弛米禁濟民食耗羨歸公興西北水利所言皆關利病又劾總督高斌侍郎周學健奏開捐例謂此風一開將見言利之徒接踵而起爲害甚大上嘉其有所見其合糾協辦大學士彭維新奪情一事議尤侃侃十三年奉命查賑山東還京以耳疾乞休上南巡伏道左蒙存問者再年八十餘卒生平以不欺爲主接人外和而內嚴不可干以私爲古文受義法於桐城方苞故風格似之苞稱及門有所祈嚮而可信其操行之終不迷惟青藜爲最詩自漢魏及宋元靡不畢貫

獨宗仰杜甫晚乃歸於韓愈性喜遊往來黃山白嶽間見諸歌詠蕭然自適著有漱芳居文集十六卷詩集三十二卷尤長於史所作史論有特識著讀左管窺二  
卷於二百四十二年事鱗次櫛比穿穴甚深先是青藜同郡以史學稱者推南陵  
汪越 汪越字季超安徽南陵人康熙四十四年舉人所著詩古文辭沖淡典博  
有綠影草堂集其讀史記十表謂史家有表經緯相牽可以考證而不可以誦讀  
學者往往不觀因排比舊文鈎稽微義訂訛砭漏所得殊多其後記一篇稱越初  
成此書以書抵其友徐克范克范爲商榷補之故考校特爲精密克范字堯民越  
之同里也時郡邑守令頗折節於越而越不妄干謁行社倉於里中請官給印簿  
而自謹其出入可爲後人法式焉

鄭燮 王鳴韶

鄭燮字克柔江蘇興化人乾隆元年進士官山東范縣知縣調濰縣以請賑忤大  
吏乞疾歸少穎悟讀書饒別解家貧性落拓不羈喜與禪宗尊宿及期門子弟游  
日放言高談臧否人物以是得狂名及居官則又曲盡情偽饜塞衆望官濰縣時  
歲歉人相食燮大興修築招遠近飢民赴工就食籍邑中大戶令開廠煮粥輪餉

之有積粟責其平糶活者無算時有循吏之目善詩工書畫人以鄭虔三絕稱之  
詩言情述事惻惻動人不拘體格興至則成頗近香山放翁書畫有真趣少工楷  
書晚雜篆隸閒以畫法所繪蘭竹石亦精妙人爭寶之詞弔古攢懷尤擅勝場或  
比之蔣士銓內行醇謹幼失怙恃賴乳母教養終身不敢忘所爲家書忠厚懇摯  
有光祿庭誥顏氏家訓遺意晚年歸老躬耕時往來郡城詩酒唱和嘗置一囊儲  
銀及果食遇故人子及鄉人之貧者隨所取贈之與袁枚未識面或傳其死頓首  
痛哭不已云著有板橋詩鈔 王鳴韶原名廷諤字夔律江蘇嘉定人兄鳴盛入  
儒林傳鳴韶濡染家學善詩工書畫治古文以清簡爲上鳴盛奇其才責以制舉  
業曰兄愛我良厚然人情各有所好不可彊也鳴盛入翰林鳴韶獨侍二親顏其  
堂曰逸野旁闢一室懸蓑笠以見志嘗搜集邑中文獻考證異同以補志乘之闕  
與錢大昕姻姪相善大昕視學廣東邀與俱往遇名勝必往游又走趙魏梁宋遍  
覽瀟湘洞庭諸勝所至紀以詩著有逸野堂文集十卷春秋三傳考十三經異義  
祖德述聞竹窗瑣碎詩宗眉山劍南鳴盛選江左十二子詩次鳴韶其中論者不  
以爲私乾隆五十三年卒年五十七

袁枚 程晉芳 王友亮

袁枚字簡齋浙江錢塘人幼有異稟年十二爲縣學生後至廣西省叔父於巡撫幕中巡撫金鉕一見異之試以銅鼓賦立就甚瑰麗乾隆元年開博學鴻詞科鉕舉枚應詔時海內舉者二百餘人枚年最少及試報罷旋舉三年順天鄉試四年成進士改翰林院庶吉士掌院學士史貽直奇其才命擬奏疏一通曰通達政體賈生流也散館改知縣分發江南初試溧水調江浦流陽再調江寧寧故巨邑難治時尹繼善爲總督知枚才枚亦遇事盡其能事無不舉嘗言爲守令者當嚴束家奴吏役使官民無壅隔則百弊自除其爲政終日坐堂皇任吏民白事有小訟獄立判遣無稽留者多設耳目方略集鄉保詢盜賊及諸惡少姓名出所簿記相質證使不能隱則榜其姓名許三年不犯湔雪之奸民皆歛迹方山谿洞外兩氓爭地無契卷訟久莫能斷枚至檢案牘山積笑曰此左氏所云宋鄭之間有隙地玉暢頓邱是也訟久則破家吾當爲若了之乃盡去舊牘別給符卷使各開墾升科聞者皆歎服有賈人販布江行舟觸戰船溺一兵死衆兵縛控舟子兼及客枚心知過失殺無罪而累客必傾貲乃令乘風張帆作觸舟狀縱之去以埋葬錢發

兵完案侍郎尹會一督學試江寧有兩騎衝其前麾且嫚罵稱某親王家奴他縣尹不敢問枚立擒治則爲大將軍投書制府者也搜其篋得關節書十餘封悉焚之重杖遣去十三年江南災銅井民運米至吳門以被劫告枚以荒政當弛刑召其魁詢之乃土人遏糶非劫也諭以情法追米還主者初枚涖溧水迎養其父父慮子年少無吏才試匿名訪諸野皆曰吾邑有少年袁知縣乃大好官也父喜乃入官舍在江寧嘗朝治事夜召士飲酒賦詩市人以所判事作歌曲刻行四方旣而引疾家居再起發陝西以知縣用上總督黃廷桂書萬餘言不省尋丁父艱歸遂牒請養母卜築於江寧之小倉山號隨園聚書籍爲詩古文如是五十年終不復仕枚崇飾池館疏泉架石釐爲二十四景遊人闢集自皇華使者下至淮南賈販多聞名造請交歡然枚詼諧跌蕩自行胸懷未嘗爲勢要牽引年逾六十猶獨遊名山嘗至天台雁宕黃山匡廬羅浮桂林南岳瀟湘洞庭武夷丹霞四明雪竇皆窮其勝又篤於友誼不以窮通生死易心嘗爲亡友沈鳳司祭埽三十年如一日編修程晉芳死負枚五千金枚往弔焚其券且撫其孤見人善稱之不容口後進詩文一言之美枚必能舉其詞爲人樂道所爲詩文天才橫逸不可方物然名

盛而膽放才多而手滑後進之士未學其才能先學其放蕩不無流弊焉其神道碑墓志銘諸文紀事亦多失實惟駢體最工論者謂抑揚跌宕深得六朝體格云枚仕雖不顯而備林泉之清福享文章之盛名百餘年來無及者著有小倉山房詩文集七十餘卷詩話尺牘說部之屬凡三十餘種嘉慶二年卒年八十二子通字蘭村工填詞程晉芳字魚門江蘇江都人家山陽業鹹於淮乾隆初兩淮殷富程氏尤豪侈晉芳獨惜惜好儒罄其貲購書五萬卷招致方聞綴學之士與共探討束髮時讀蕺山劉宗周人譜見其論守身事親大節輒心慕之故以蕺園自號又問經義於從叔廷祚學古文於劉大櫆與商盤袁枚唱和詩文並擅其勝江淮老宿咸與上下其議論南游金陵愛栖霞牛首之勝憑眺山川考證今古所至傾其坐人乾隆七年召試授內閣中書十七年成進士補吏部主事遷員外郎四庫館開以薦爲纂修官書成擢翰林院編修晚歲家貲盡官京師至無以舉火四十九年乞假遊西安將謀諸畢沅爲歸老計抵關中一月卒年六十七晉芳學無所不窺經史子集天星地志蟲魚考据俱能研究晚與朱筠戴震游乃治經究心訓故其卒也京師爲之語曰自竹君先生死士無談處魚門先生死士無走處謂

朱筠及晉芳也其聲華之盛如此著有周易知旨編三十餘卷尙書今文釋義四十卷尙書古文解略六卷詩毛鄭異同考十卷春秋左傳翼疏三十二卷禮記集釋諸經答問十二卷羣書題跋六卷勉行齋文十卷蕺園詩三十卷 王友亮字景南安徽婺源人乾隆四十一年舉人官內閣中書軍機章京五十六年成進士改刑部主事遷員外郎轉山東道監察御史擢禮科兵科給事中累遷通政司參議太僕寺少卿通政司副使卒年五十六友亮官刑部決獄多平反晚年巡視南漕撫卹運丁寬嚴有體漕船之行速於往日少在金陵有金陵雜詠及巡視南漕有視漕小草以詩名海內者三十年詩格與袁枚相近其爲文議論正大敍事有法亦似程晉芳著有雙佩齋集六卷

葉西

葉酉字書山安徽桐城人乾隆元年由國子生薦舉博學鴻詞四年成進士改翰林院庶吉士散館授編修充三禮館纂修官九年充河南鄉試副考官十二年提督貴州學政十七年提督湖南學政淳陞至左庶子以事降補編修酉少不喜爲科舉之文家貧嘗爲童子師志行堅確不妄與人交讀書奮發冬寒夜靜每依燈

火坐門外雪深不輟尤邃於經學師同里方苞著春秋通論西亦著春秋究遺十六卷其書雖宗荀說而亦稍有從違於胡傳苛刻之論及公穀附會之例芟除殆盡左傳亦多所糾正論者謂其精識駕於啖趙其曰究遺者用韓愈贈盧仝詩春秋三傳東高閣獨抱遺經究終始語也又謂中庸爲漢儒所撰非子思作孔孟山東人故論語孟子皆稱東山漢都長安華山在焉故引山稱華嶽論者亦謂其讀書得間喜詩督學湖南歸值高宗有謁陵及平西夷大典西賦詩彙而顏曰日下草西與沈德潛袁枚同舉詞科又爲鄉會試同年友枚嘗以德潛善詩西善說經尤用心許罷官後居石頭城下花欄水窗婆娑輸墨與枚益以文字相親他著有詩經拾遺十三卷

邵齊燾王太岳

邵齊燾字叔屖江蘇昭文人幼異敏甫受書能曉大義乾隆七年進士改翰林院庶吉士散館授編修居詞館十年纂修書局者再九年十七年兩充順天鄉試同考官嘗獻東巡頌時稱爲班揚之亞羣公爭欲致之門下齊燾落落寡合年三十六卽罷歸自顏其室曰道山祿隱三十年高宗南巡詔在籍詞臣試闈下以母老

辭齊燾意度夷曠章草入晉人室善爲駢體文意欲矯陳維崧吳綺章藻功三家之失故所作以氣格排奡色澤斑駁爲宗秀水鄭虎文云今古駢散殊體詭製道通爲一本朝惟齊燾一人而已然齊燾廉嗛自以爲不足常用陳思王語僕常好人譏彈其文八字鐫爲小印與王太岳書自言根柢疏薄智力凡弱詞不副意意不逮見其虛心如此主常州龍城書院黃景仁洪亮吉皆從受學卒年五十二有玉芝堂詩文集九卷同時爲駢體文者有武進劉星煒錢塘袁枚吳錫麒陽湖洪亮吉孫星衍曲阜孔廣森南城曾燠其後全椒吳鼒合選爲八家四六云 王太岳字基平直隸定興人乾隆七年進士改翰林院庶吉士散館授檢討十五年充日講起居注官十八年充江南鄉試副考官十九年授侍講轉侍讀充會試同考官二十年補甘肅平慶道二十三年調西安督糧道三十三年擢湖南按察使三十六年調雲南按察使三十七年擢布政使是年以審擬逃兵寬縱落職四十二年命在四庫全書館爲總纂官四十三年仍授檢討四十七年擢國子監司業後三年卒年六十四太岳生有至性每言及古來忠義事輒爲感慨流涕卽觀劇亦如之二十六歲喪父事母色養四十年如一日宦轍所至必與板輿俱比居喪年

已六十哀毀一如少壯性好朋友與邵齊燾鄭虎文顧汝修諸人尤善寓書往復率以文章道義相劘切每別必泣涕不自己言經兼訓詁論學兼取陸王詩宗魏晉下及唐人純古淡泊時稱高格初好爲駢體文見齊燾作歎爲天授遂輶不作而規史漢及韓柳氣格高簡卓然名家尤有志於經世之務所至必爬梳剔抉據今考古咨民之疾苦而考論之在平慶及西安皆有惠政又留心水利著涇渠志三卷在雲南閔銅政之弊於是旁搜博訊指利害所由來其言銅政之要必寬給價給價足然後廠衆集廠衆集然後開採廣廣採則銅多銅多則用裕又言雲南山高脈厚出產礦砂誠使加以人力穿峽成堂則初闢之礦入必不深而工亦不費兼地僻林萃炭亦易得論尤切中當時補救釐剔厥功甚偉滇人祀之七賢祠著有清虛山房集芥子先生集凡二十四卷

鄭虎文 王右曾 沈叔埏

鄭虎文字炳也浙江秀水人乾隆七年進士改翰林院庶吉士散館授編修三充順天鄉試同考官尋遷贊善二十一年充河南鄉試正考官二十二年充會試同考官二十三年提督湖南學政二十四年提督廣東學政虎文少孤有至行於學

無所不通尤工詩文乾隆十年得元至元二年玉甕置承光殿南御製玉甕歌命  
廷臣賡和時以虎文之詩爲最歸後主徽之紫陽書院十年主杭之紫陽崇文兩  
書院五年家有盛湖草堂詩酒之會一舉彌月性不苟取囊篋每空家人以告笑  
曰姑强支持寒餓當共之吾寧苦身無以病吾心也素以經濟自負嘗願爲知縣  
謂縣令親民知疾苦一令賢一縣治天下令賢天下治時以爲知言著有吞松閣  
集王右曾字穀原亦秀水人乾隆十六年高宗南巡召試授內閣中書十九年  
成進士改禮部主事遷刑部告歸後十餘年卒右曾在都下極爲陳世琯汪由敦  
所推許釋褐後皆以爲當得上第旣入三甲人猶比之朱彝尊以王儀曹稱之工  
詩與錢載齊名時號錢王其詩專務沈靜畢沅稱其削膚廓而見性情能自成一  
家歸後飄泊江湖間東南大吏爭相延攬性豪放談笑風生賦詩飲酒無虛日著  
有丁辛老屋集沈叔埏字埴爲亦秀水人乾隆三十年高宗純皇帝南巡召試  
一等賜舉人授內閣中書充方畧館一統志通鑑輯覽分校及歷代職官表協修  
官又充四庫全書武英殿分校成五十二年進士授吏部主事諸總裁方引以自  
助而叔埏以母老到部未十日卽乞養歸築室錦帶寶帶兩湖閒學者稱雙湖先

生主魏塘講席尤久教士多有成者嘉慶八年卒年六十八著有頤采堂集十五卷弟珏字景崔少受叔挺之學詩爲錢陳羣所激賞附刊於香樹齋續集中乾隆五十九年獻賦南巡行在列二等著有聖禾鄉農詩四卷

許伯政

許伯政字惠棠湖南巴陵人乾隆元年舉博學鴻詞七年成進士知四川彭縣有惠政值金川用兵供費浩穰伯政善措置軍給而民不擾內擢禮部主事陞員外郎遷山東道監察御史年未六十以告歸伯政學問該洽討論故實必援引剖析使無遺義歸後家居數十年不履城市究心經傳往往出己意爲論著有易深八卷春秋深九卷詩深十六卷尤精步算之學有全史日至源流三十二卷謂天周宜用三百六十度日法宜用九十六刻宮次非恆星一定之居歲實奇零積久始覺損益不宜概爲四分日之一其論皆爲確當惟用邵康節皇極經世元會運世之說合於御製考成之法頗嫌附會又著有事三堂文集益青閣詩集

汪憲 朱文藻 吳騫

汪憲字千波浙江錢塘人乾隆十年進士官刑部主事遷員外郎以父母老乞養

歸憲博雅好古於經尤長於易嘗謂學易期於寡過欲過之寡惟在知悔悔存而凶吝漸消可日趨於吉因以存悔顏其齋又取易上下經爲之說解著易說存悔二卷性好蓄書丹鉛多善本求售者雖浮其值不與較家有靜寄東軒具花木水石之勝朱文藻嘗介嚴可均見憲憲卽館之東軒偕同志數人日夕討論經史疑義又悉發所藏祕籍相與校讐稍暇則投壺賦詩爲娛樂嘗以徐鍇說文繫傳四十卷世罕傳本好事者祕相傳寫魚魯滋多或至不可句讀憲所得雖屬宋影鈔本然已譌不勝乙因參以今本說文旁考所引諸書證其同異著說文繫傳考異四卷又屬朱文藻採諸家評論繫傳之辭及鍇兄弟軼事爲附錄二卷其書縷析舊文徹首徹末論者謂其有功小學詩文不多作作必精詣一字未當往往沈想經時必愜意始脫橐著有振綺堂橐又苔譜六卷憲卒後值四庫館開購求遺書憲子慎選善本經進恩賜佩文韻府並擇其精醇者御製題詠仍俾珍藏以爲好古之勸云 朱文藻字映潛浙江仁和人諸生少嗜學漁獵百家精六書自說文以下及鍾鼎款識無不貫串源流又通史學凡紀傳編年紀事通典諸書輒能考其缺略審其是非王杰督學浙江延訪之至京師佐校四庫全書復奉敕在南書

房考校嘗游山左阮元孫星衍與之商訂金石成山左金石志後復爲王昶修西  
湖志纂輯金石萃編大藏聖教解題等書詩在劉夢得張文昌之間嘉慶十一年  
卒年七十一著有續禮記集說說文繫傳考異碧谿草堂詩文集碧谿詩話碧谿  
叢鈔東軒隨錄東城小志東皋小志青烏考原金箔考苔譜萍譜 吳騫字槎客  
浙江海寧人諸生生負異稟過目成誦篤嗜典籍遇善本傾囊購之校勘精審所  
得不下五萬卷築拜經樓藏之錢大昕爲之序謂所藏百氏皆具獨言經者統於  
尊也尤喜搜羅宋元刻本如陶淵明謝元暉諸集皆取而重梓之學者珍爲祕寶  
嘗得宋本咸淳臨安志刻一印曰臨安志百卷人家其風致如此兼好金石以所  
藏商鳥篆戈吳季子劍等作拜經樓十銅器詩少與陳鱣講訓詁之學所爲詩文  
詞旨渾厚氣韻蕭遠晚益深造不屑爲流俗之作性慈善嘗買一婢詢之良家女  
也撫爲己女嫁之一時咸頌其厚德著有國山碑考一卷桃溪客語五卷小桐溪  
吳氏家乘八卷蘇祠從祀議一卷拜經樓詩話四卷論印絕句二卷又有愚谷文  
存拜經樓詩集嘉慶十八年卒年八十一

李中簡 戈濤

李中簡字廉衣直隸任邱人少受知於督學錢陳羣與瀋陽戴亨講論詩法乾隆十三年成進士改翰林院庶吉士散館授編修二十一年充山東鄉試正考官二十二年入直上書房尋擢中允遷侍講二十四年提督雲南學政二十八年陞侍講學士充日講起居注官三十三年充湖南鄉試正考官三十五年充湖北鄉試正考官三十六年提督山東學政以罷吏議罷官賞給編修乞疾歸中簡博學工詩文在詞館時與同里朱筠兄弟及紀昀齊名然杜門著述不標榜聲氣交獻縣戈濤以古道相勗勵濤死爲修總服禮其爲學本之孝弟以厲文行視學所至必察土風便宜陳奏刊布應讀書目以教諸生詩五古宗漢魏盛唐七古專學大蘇陸燿嘗稱其詠懷古風諸什溫柔敦厚原本忠孝尤徵學養之粹紀昀懷人詩云廉衣振高節神龍誰得控又云古道良足希一官非所重其推挹如此趙懷玉師事之卒年六十一著有應制詩二卷賦頌二卷就樹軒詩十七卷雜體文六卷

戈濤字芥舟直隸獻縣人少穎異讀書志氣激發慨然與古人哀樂然性介特不爲苟同從瀋陽戴亨學詩受知於督學錢陳羣弱冠舉於鄉任河南嵩縣知縣緣事解官遊京師五年學益老名益立薦經學乾隆十六年成進士改翰林院庶吉士

士散館授編修十八年充江西鄉試副考官二十一年充雲南鄉試正考官尋遷御史轉刑科給事中三十三年充福建鄉試正考官官御史時數上封事會京察當事欲置一等辭曰御史言事職也豈可以此階榮進哉聞者服其言而止擇交尤嚴以文章道義相切劘者邊連寶李中簡二二人而已詩格律嚴整綺語理語皆所切戒於唐宋諸大家實能登堂而躋其戩陶樑謂畿輔詩人以濤爲巨擘古文師魏禧疎宕有奇氣著有坳堂詩集十卷畿輔通志坳堂雜著戈氏族譜獻縣志

郭起元 蕭正模

郭起元字復齋福建閩縣人諸生少肄業鼈峯書院蔡世遠稱其品芳潔能文章乾隆元年舉博學鴻詞弗就督學周學健以賢良方正薦授安徽舒城知縣下車釋冤獄數十人調桐城又調太湖疏陂塘建義學未踰年又調盱眙攝泗州知州值河淮汎濫居民蕩析起元經營相度凡五載悉其利害形便盱眙舊城於永樂閒廢至是創議建置曰盱眙阻山帶淮東至海南抵江洛汴繞其北汝颍會其西鎖鑰毫壽屏蔽淮揚自古未有不得盱眙而能東下江左西窺中原者若以山盱